

撫甯縣志卷十四

鄉型下

明

楊珍省祭官母早逝事父惟謹侍食侍寢晝夜無怠內外咸以孝子呼之父疾篤醫藥無效珍嘗其便泄以味甘知不起遂治後事如禮及葬廬於墓側負土成墳二年乃歸詔立坊以旌其門

金鏞縣生員父禧早逝母高氏守節撫鏞凜然有松柏操鏞性孝負米採薪勤於供養母偶病卽憂形於色焚香告天願以身代進食必先嘗其寒熱由選貢累官至光

祿寺署正以母老乞歸清操儉德有古人風

楊有成縣生員八歲喪父哀毀如成人母有疾湯藥親供
卒之日水漿不入口者數日及葬結廬於側日三次哭
奠寒暑不輟時邊報甚急人多逃匿有成不爲動墓舊
有枯松逾歲復活禽鳥恆棲噪其上人皆以爲純孝所
致詔旌其門

袁卉素敦孝行母早逝及父沒廬墓側三年蛇馴尋次地
涌甘泉世稱孝感按院書匾以旌之

孫國賢母沒廬墓三年詔旌其門

翟昊本衛人尙書鵬父也性溫厚與物恂恂嘗受侮而不

報若怯者然及見義輒勇爲濟困扶危人有辜恩負貸者亦無愠色苛辭以相較行誼卓犖人祀鄉賢

許敬邑宣北人景泰三年大饑出粟八百石賑濟之詔旌其門

王信本衛人進士印祥之祖成化七年大饑出糧米八百石賑濟之詔旌其門

徐霖生平積德以寬忍爲務養孤姪產金均分橫逆不校邦大夫高其行誼給授冠帶三子九孫無白丁

王天相樂善好施不遺餘力嘗捐穀以濟軍本縣扁旌曰耕讀樂業泉石幽貞

馮守業捐資活貧出粟救荒子孫顯達人以爲好善之報
楊念治家嚴肅一門雍睦七世同居本縣旌之

郭純學樂善好施神宗時歲荒捐米賑濟本縣旌其門
黃應科性喜施舍族人黃大領家貧轉徙失業科招之回
給田一頃二十畝養之

鍾鉞孝友儻有大節扁旌曰行孚月旦

高鑑素業農質樸未學而好敦善行事親孝撫兩兄孤子
周貧濟乏鄉人服其長厚

王一介性寬和恤難周急鄉里稱長者

國朝

徐從新武庠生母性嚴從新恪遵母訓任俠好施人服其義

徐進孝農人也父患心痛幾死貧不能延醫禱神許愿疾愈愿未償疾復作孝割胸前肉如掌禱還神愿疾竟瘳以肉挂樹上數月不腐鷹雀亦不食人謂純孝之感

邑人王運恆紀徐孝子詩十章云兔峯之西鄉曰翟田涓龐萃止孝子生焉猗歟孝子徐氏之息皇錫嘉名能稱其實父病沈篤藥石無人傍徨號泣求援於神哀哀祝愿剝豕封羊父病復作刲腹以償捧肉薦神神心亦痛監茲血誠拯其父病肉懸樹間感孚物類弗畱弗餐鷹饑蠅穢不敗不腐數月如新天存懿物以示世人載拜敬書一字一淚高山景行俯仰含愧至孝流芳編中數見以身代牲古今獨擅夔哉絕德邑乘光垂不慚銀管有道之碑

劉從性母李年八十餘病臥不起性赴關帝廟剗股禱神
爲母借壽病尋愈

趙名元生員母卒廬墓哀經不去身晨昏哭奠三年如一
日本縣給扁督學上其事予旌

趙夔龍兄弟同居樂舉善緣年登八十子孫多遊庠序鄉
人重之

楊重望武庠生賦性和平樂善好施義方教子品隆鄉介
惠文俊由吏員任海甯大使清慎老練士民德之居鄉好
禮巡撫扁旌曰雅操高風享年八十四

單擇中武庠生持身醕謹教子嚴肅冬月恆舍薪米以濟

貧子孫多遊庠序

徐應虎性耿介尙義樂施本縣扁曰一鄉善士山石道呂
扁曰德壽軼倫

張敬銘尙義急公孝友信果壽官耄耋本縣扁曰德副輿
情

陳王基武庠生耕讀教子修建廟宇不出入公門

楊啟祥武庠生性樸直行敦謹力田課子足跡不入公門
夏正名臺頭營人天性孝友總角時卽知懷物遺母聞他
人喪親輒爲涕泣家貧不能讀書隨父國祥營家計曲
盡菽水歡父歿哀毀骨立母有疾焚香默祝願減已算

以益母壽及歿廬墓三年時以孝稱卒祀忠孝祠子生員德厚亦廬墓三年

惠爾龍下莊人生員惠愉子幼失怙以貧廢學母俞氏病求以身代延壽八十四歲至乾隆九年病故爾龍悲思不已廬墓三年郡縣上其事觀察方公覆加確察令本縣自行褒獎

趙景明興盛峪人年九十七弟光明九十四冊明九十一康熙甲子邑侯趙端題同胞三老四字贈之每下鄉必與款話同堂五世慶集曾元景明壽百有十歲餘皆臻百歲扁至今存

徐麟祥歲貢生年七十居父喪依然孺慕名其齋曰爲善最樂又刻忍讓敬恕於堂人皆稱爲有道邑侯張公奎祥贈純嘏是常扁八十初度邑侯莊公學愈贈德厚天全扁郡守梁公錫蕃贈盛朝人瑞扁

單槐字卜黃乾隆壬申科舉人選廣文親老不仕讀書樂善承先人敦睦遺訓丁酉春創立宗祠規模宏敞置祭田千畝市廛數十間歲租所入以供祭祀設義塾延師教族子弟冠婚喪葬事有依鰥寡孤獨月有養刊立規條報官存案至今繼繼繩繩子孫食其德云

張元會榆關人監生樂善好施族有貧不能婚葬者恆周

恤之冬月乞人必與之熱粥晚約鄉老三四人作真率會訂期五日相與話桑麻訓後進乾隆五十七年卒壽九十七五世同堂

王毓德字遂明歲貢生天性孝愛母歿欲廬墓以父在不果父歿乃伸其志年七十餘墓祭必哀與人言輒以孝相勉晚得孝經衍義一書昕夕讀之咸豐己未學憲萬青藜旌以庸行耆儒額

王舉深河人天性慈厚鄉里以善人稱之道光十八年邑侯許夢蘭表其門

李玉牛家店人自明萬厯三十六年李肇端遞傳至玉九

世同居每世率以一人主家政第五世止二人曰生芝
興芝生芝無子興芝生晏文以文爲生芝之後文後無子
晏生逢太逢春逢永以逢春嗣文逢太生瑞逢春生玉
璽璽珂逢永生環琢而瑞早卒妻惠氏有賢能玉持家
政與弟璽等以瑞妻爲本宗長嫂使主內治凡事必參
議而行食指五十餘人內外整肅郡守游公賜額曰李
氏義門縣令張公賜額曰風希百忍

張廷璐字寶臣東新寨人監生居家孝友五世同堂男婦
五十餘人格守教訓壽八十餘卒至今子孫奉行殆追
百忍遺風焉

李永貞邠各莊人貧爲人傭三十二歲妻亡不娶恐不能
孝母也無子亦不繼晨夕自炊入市必買時物遺母母
壽八十四而終其姊五十餘家貧無子將改適永貞復
爲養生送死不遺餘力其至姓過人求之於藜藿家益
亦難矣

王起發黑石堡人樂善好施嘗捐資修補界嶺口外十八
盤嶺道前後十里行人便之道旁有碑記其事

唐明綱字敘三林家翟坨人性至孝父嘗病泄久不愈將
危明綱取其糞嘗之辨其味滑淡覺無生理遂呼號籲
天焚香祈禱求將已壽借父一紀未曉父病減數日果

愈後十餘年父又病泄恆遺矢於禪明綱手自滌濯日數次無厭踰三年父沒喪葬無不如禮鄉人稱之

熊懋顯縣北田莊人後遷居口外建昌縣父瑚早喪母張氏懋顯事之最孝母七旬卒廬墓三年建昌縣牛營巡檢張曾旌其門時道光二十三年也

陳福田守禦所千總銜生平好施與重然諾以孝弟力田世其家道光十二年歲大饑米價昂貴民食爲艱慨然以施飯濟貧爲已任自正月初五日起至十二月二十五日止按日捐米五六升午正煮熟以待村內外之貧苦者鄉人德之以後無論豐歉遂沿以爲例道光二十

五年縣令李公旌其門曰樂善不倦咸豐九年福田卒
子庭桂謹守遺訓遵行不怠迄今已四十餘年

張孝子起鳳牛蹄寨人父正母王氏其母遺腹三月而父
卒孝子生而岐嶷賦性仁孝年甫五六歲卽知博親歡
凡嬉戲之事無不惟母是從每一出入必稟命遇美食
必母先嘗而後敢食家素貧賴母紡織以生一日母因
勞成疾孝子年方冠見母病不起日夜悲號母病昏米
漿不入口者數日孝子侍左右衣不解帶者亦數日及
母病少間孝子問母所欲食母伏枕良久應曰要食人
肉蓋以子無財難以爲悅也孝子爽然若失遂唯唯而

退潛往其村三宮廟叩禱於神田他人之肉不可得而食惟吾之肉可得而食之食之而疾愈則吾可以生食之而疾不愈則吾亦不能獨生祝畢挺然用利刃割左股一瓣懷歸烹以進母食之果愈孝子亦無恙此事人不知也母亦不知也厥後事聞乾隆丙子邑侯單烺造其里表其門曰割股療親至今里人饒播爲美談

俞泌字艱臣嘉慶丁卯科亞元任定興教諭品行端方學問淵博解組後猶家居授徒誨人不倦道光戊戌舉鄉飲大賓壽八十六而終

曹震盧王莊人性正直講明孝友善治家有公藝風一門

和睦郡守王公旌其門

金錫祿字荷菴樊葛莊人

恩貢生由

國史館謄錄議

敘選授河間阜城縣教諭時值土匪竄擾協同團練守城有功加六品銜性篤厚端方睦鄉好義授徒於家三十餘年成材甚衆凡貧而有志讀書者從不受其修脯復資助之以成其學里中有烈婦馮常氏嘗出資代爲請旌以勵風化年老致仕教子課孫樂善不倦卒年七十七

單德林東河南莊人幼失怙事母最孝家赤貧甘旨無缺因無以爲養每歲服賈遼東同治四年冬關外馬賊蠭

起所過殺掠德林猝不及逃忽念老母在堂將不得終
養悲不自勝欲突圍而走恍惚間夢神示少待盜行且
去保無害也數日賊果退得歸母子相抱而哭遂自誓
終身茹素母年八十病不能興展轉牀蓐動必需人至
夜尤甚德林日夜扶持須臾不離未嘗委之室人三年
無少怠母八十三歲卒德林已六十三歲矣思母輒泣
繪像懸之於室每食必奉飯如生焉其從堂妹適張氏
中年喪夫母家及夫家皆赤貧嘗就食德林家德林謂
之曰妹果守義我有一盂粥當分妹半盂也卒踐其言
王贊臣平市莊人生員父歿訓蒙以養母每自外歸入門